

JAWAPAN

Tuan Yang di-Pertua,

Terima kasih kepada Yang Berhormat Tumpat di atas soalan yang telah dikemukakan.

2. Sepertimana Yang Berhormat sedia maklum, Kerajaan sejak dahulu lagi konsisten dengan dasar luarnya terhadap isu Palestin. Kerajaan senantiasa memberi sokongan padu kepada Palestin dan rakyatnya baik dari segi politik, ekonomi, moral dan termasuklah juga bantuan-bantuan berbentuk kemanusiaan, sumbangan kewangan, dan pembangunan infrastruktur asas dan teknikal baik secara langsung mahupun melalui pertubuhan antarabangsa dan badan bukan Kerajaan.

3. Di persada antarabangsa pula, Malaysia giat memainkan peranan aktif dalam usaha untuk mencari penyelesaian yang adil dan berkekalan kepada konflik Palestin-Israel, khususnya ke arah mewujudkan sebuah negara Palestin yang berdaulat dan merdeka. Dalam hal ini, Malaysia telah secara terbuka dan lantang memperjuangkan hak asasi rakyat Palestin di pelbagai platform antarabangsa seperti Pertubuhan Kerjasama Islam (OIC), Majlis Hak Asasi Manusia Pertubuhan Bangsa-Bangsa Bersatu (UNHRC), Pergerakkan Negara-Negara Berkecuali (NAM) dan Pertubuhan Bangsa-Bangsa Bersatu (PBB) selain terus memberikan dorongan dan sokongan padu kepada pucuk pimpinan Pihak Berkuasa Kebangsaan Palestin atau dengan izin *Palestinian National Authority* dan yang terkini Kerajaan

Perpaduan Palestin dalam mendepani pihak Israel melalui proses rundingan damai.

4. Malaysia juga berani mengeluarkan kenyataan-kenyataan yang mengutuk dan mengecam keras tindakan serta perlakuan tidak berperikemanusiaan rejim Israel yang menceroboh wilayah Palestin serta mengenakan pelbagai bentuk penindasan, kekejaman dan sekatan ke atas rakyat Palestin.

5. Sepertimana yang diketahui oleh Yang Berhormat, pada ketika ini, rundingan damai antara Palestin dan Israel masih belum mencapai matlamatnya. Malaysia berpendirian bahawa penyelesaian kepada konflik Palestin - Israel tidak mustahil untuk dicapai melalui proses rundingan damai Palestin-Israel sekiranya pihak-pihak yang terlibat betul-betul bersikap jujur, ikhlas dan telus dalam melaksanakan persetujuan-persetujuan yang telah disepakati dalam rundingan tersebut.

6. Dalam hubungan ini, Malaysia menggesa supaya semua pihak untuk terus berusaha mencari satu penyelesaian komprehensif yang adil dan saksama berdasarkan dengan izin, '*Roadmap*' dan resolusi-resolusi Majlis Keselamatan Pertubuhan Bangsa-Bangsa Bersatu yang berkaitan, di mana kedua-dua buah negara dan rakyatnya dapat hidup bersebelahan dengan satu sama lain dalam keadaan aman dan selamat.

Sekian, terima kasih.